

Zorzi Corner procurator zoso e sier Nicolò Michiel, per aver danari di mandar in Campo.

*Di Campo, dil provedador Capello, vene lettere, di ozi, di hore 13.* Dil partir dil provedador Griti per Moncelese con quelli nominati. *Item*, se provedi di danari, perchè seguirà qualche gran disordine che Dio non voglia, e vede mala contentezza nel Campo, e molti homeni da ben si fa cassar a le mostre per li malli pagamenti, e si provedi a la fortification di Padoa. *Item*, manda una lettera auta dil provedador di Moncelese, Marzello.

*Di Moncelese, di sier Marco Marzello, proveditor, di 17, hore una de di.* Chome, per exploratori, ha cavali 40 di spagnoli è in li borgi di Este dimandavano la via di andar Arquà, et si era sta snudà quella villa. *Item*, poi per altri erano zonti, ha 1000 cavali de inimici al ponte di la torre, ne altro si sentiva, e che 'l Campo si levarà questa matina di Montagnana. *Item*, di Jacomo Manzom retenuto farà quello vol la Signoria, che lo expedirà *juxta* i demeriti da ribello, ma stano sempre in arme et non ha tempo. *Item*, per la lettera scrive in Campo: chome sono questi contestabeli con le compagnie deputati, *videlicet* Lorenzo di Alexandria nel reverin a presso la rocha, Cruciano Corso fuori dil revelin verso porta Freda, Frachasso e Nicolò da Siena a la centa inferior verso la porta di santa Maria, Mathio da Zara a la guarda di la piazza. *Item*, per uno buletin *post scripta*; è zonte le scolte tien fuora, scrive non è nulla. *Item*, avisa la compagnia di Lorenzo di Alexandria eridava: danari, danari.

Fu posto, per sier Francesco Barbaro e sier Hieronimo di Prioli cai di XL, la parte di far governador il magnifico conte Bernardin, con homeni d'arme 200, ducati 25 milia a l'anno in tutto, e si mandò do zenthilomeni nostri, da esser electi per questo Consejo, homini d'autorità, che li porti il baston e stendardo, e persuadi li altri condutieri ad ubedirlo; et fo fato lezer per li savij molte lettere in questa materia di provedadori di Campo, *adeo* sier Francesco Barbaro si tolse zoso e messe de indusiar, in la qual opinion introno i savij dil Consejo e di terra ferma, numero 6, che 'l Bernardo era. Parlò sier Al-  
284\* vise di Prioli è di pregadi *quondam* sier Zuane altamente, per la opinion dil cao di LX Prioli che restò su la sua parte, cargò molto el provedador Griti et Lucio *etc.*, et laudò il conte Bernardin; li rispose sier Piero Capello; andò le do parte, una non sincere, 2 di no, 38 dil Prioli cao di XL, 116 di l'altro cao di XL, et questa fu presa, *videlicet* l'indusia, et fo tolto in nota tutto il Consejo e fo sacramentà tutti,

perchè con effecto sono cosse di grandissima importantia.

*Di Campo, dil provedador Capello, vene lettere, di ozi, hore 16.* Chome non ha altro di Moncelese, manda una lettera di 13, di Pexaro. *Item*, dil zonzer li sier Alvisè Loredan *quondam* sier Lucha, con le 10 caxache per li turchi, e le lauda sumamente averle mandate, li qual turchi si portano virilmente.

*Di Pexaro, di* . . . . .

*Di Treviso, vene lettere di sier Alvisè Mocenigo el cavalier, provedador zeneral, di ozi.* Zercha la barufa seguita tra quelli fanti dil Zitolo e li soi provisionati, e si scusa poi, e fuora non seguitò più disordine et è remediato a tutto *etc.*

Fo leto le lettere si scrive in Hongaria in risposta, et era varie opinion li savij dil Consejo e terra ferma et io; do lettere zercha far di la nova confederation *etc.* Et li 4 savij ai ordeni vol la conclusion non potendo far di mancho di haver subsidio da quel regno, e darli fin 5000 ducati. Or andò in renga sier Faustin Barbo, et per l' hora tarda fo rimessa a un altro pregadi che sarà doman.

*Di Civaldi di Bellun, dil Balbi, podestà e capitano, di 17, venute questa note.* Chome el capitano stava in Agort andò in Agort, e quelli homeni li disse ritorneriano volentieri sotto la Signoria nostra, ma voriano esser sforzati. *Item*, de li intorno non è zente alemana. *Item*, Hieronimo di Allam venuto li, à dato fama di vegnir 300 cavali. *Item*, quelli di Agort disseno haver auto hordine brusar le taje di viniziani, et di la taja li ha dato Lorenzo Felzer *etc.*; scrive el dito podestà zercha Francesco Rondinello è contestabele in castello.

*Di Pordenon, di sier Alvisè Bondimier, proveditor, di 17.* Dil zonzer di domino Piero Baldisera Scipion con la compagnia di cavali lizieri, et andoe a le caxe di quelli tristi haveano fato habiti alemani e corvati, e li tolseno e li cavalli *etc.*, la nome di qual mandò in una poliza, li qualli non stavano in caxa, *imo* erano snudate le caxe, et dite robe et cavali fonno di essi soldati *juxta* i mandati di la Signoria nostra. *Item*, prese uno tristo, fo il principio di far far le insegne di Austria; li scrive di alcuni va sussitando li villani *etc.*; li fo risposto contra questi facesse justicia. *Item*, scrive aver chiamà il Consejo, e proposto facesseno 100 fanti pagati per l'oro, che saria ducati 320, e cussi fo preso la parte e darano per tuto ozi ducati . . . per 50 fanti, poi il resto, li qual danari manderà per sier Zuan Michiel